

# Gwerz Lok-Ronan Koad-Nevet

## PE GALV AN DROVENI-VRAS

War don gwerz koz Santez Anna ar Palud.



Eus Lok-Ro-nan Koad-Ne- vet, war bro goz ar Por - zou,  
Tao - lit, kle-ier ben - ni - get, son - galv hor par - do - niou;  
Ha c'houi, klo-c'hig sant Ro-nan, la - ouen ha gant du - di,  
So - nit, so - nit an hir-glas, da zent an Dro - ve - ni.

1

Eus Lok-Ronan Koad-Nevet, war bro goz ar Porzou,  
Taolit, kleier benniget, son-galv hor pardonniou;  
Ha c'houi, kloc'hig sant Ronan, laouen ha gant dudi,  
Sonit, sonit an hirglaz da zen! an Droveni.

2

Eus liorzou Lezargant, eastig-noz telenner,  
Livirit d'hor soudarded 'z eus pardon bras er gêr;  
Du-hont, peskig arc'hantet, 'n eur fringal er mor glas,  
Digas d'hor martoloded sonj an Droveni vras.

3

Bro c'houek, d'ho paotred dispont eur vagerez dener,  
Salud, douar Iwerzon! Eren, leun a c'hlauster!  
Gant gliz puilh bennoz Doue war e vamm hag e dad,  
Salud, kavel sant Ronan, salud a galon vat!

4

Eur c'helc'h aour en-dro d'ho tal e melchon trigornek,  
Trugarez d'eoc'h, sant Padrig, abostol kalonek!  
Ni zalc'h e'hoaz eun elfennig eus ho feiz ken disklab,  
Strinket diouz Enez ar Zent da heul Ronan, ho mab.

5

Dilezet hep marc'hata, mintr ha baz alaouret,  
Setu hor zant, gant eun ael, d'hon Arvor digaset;  
Traon Leon, eur pennadig, a zo test d'e vuhez...  
Henchet mat gant an ael gwenn eman war hor menez.

6

Trid 'ta, torgenn goz Nevet! selaou korn-boud ar vrud  
O teurel da lez-ano e-touez gouennou an dud;  
Digor frank da veingleuziou, eur gêr, eun iliz veur  
A flastro lochig ar paour a ziskuiz war da leur.

## 7

Ha lamm drant, gant levezet! Keit ma pado ar bed,  
Roudou da zant, bep c'houec'h vloaz, eiz devez hed-ha-hed,  
A vo dispennet dalc'hmat, hag en deiz hag en noz,  
Gant strolladou Kerneviz, o kana 'n hor yez goz.

## 8

Pa zigouezas sant Ronan war leinenn Koad-Nevet,  
Dirak kened hor c'horn bro, e galon zo mantret;  
Eur bedenn start ha gredus a zav d'e vuzellou,  
A darz, hag e ganaouenn zo trec'h d'ar c'hantvejou.

## 9

Eun den o chom d'ar mare war dachenn Mez-Odren,  
Er c'hav, er c'har, en sikour da zavel eul lochenn,  
A gemer e blijadur o selaou e gomzou;  
Siouas! pa zistro d'ar gêr, Keben ra gwall-zellou.

## 10

Dizamm kaer evel e Vestr, an Aotrou Krist Jezus,  
Ronan, tamallet ganti eus eun torfed euzus,  
A zo bet stlejet dre heg dirak lez-varn Kerne;  
Kavout a ra, lec'h droulans, karantez ar roue.

## 11

Galon, o chom d'ar c'houlz-se 'n e lez er Perennou,  
A lakaas digeri karr-hent an Treuz-Hentchou,  
Evit gallout dont war ware'h da gaout e vignon ker,  
Hep pignat froud an Odez, war-zu traoniou Kemper.

## 12

Eus hon tadou, beo-buhezek e pad ar c'hrenn-lavar:  
Hervez d'ezan, sant Ronan oa gwiader dispar;  
Patron ar gwiaderien, kennerzit anezo:  
Biskoaz kement a noazder n'eus redet dre ar vro..

## 13

Diskuliet e zantelez, embannet gant an holl,  
Kalon paour Ronan a gren; aon en deus da 'n em goll;  
Dre guz, e kerzas en hent: a zehou d'an hanter-noz,  
Tostik-tost da Zant Brieg, 'ma ehan e venoz.

## 14

D'eoc'h, dremmwelloù brao Hillion, e zellou tenera.  
Daoulinet war ho touar, e bedenn ziweza  
A lammas diouz e galon. Laouen, gant tarz an deiz,  
Ene digailhar Ronan a nij da Gêr Sent Breiz.

## 15

Ar zant mat, abarz tremen, evit mervel paour kez,  
A reas teir lodennig eus e dammig danvez:  
E galon da zant Padrig, an ene da Zoue,  
Perak e gorf da Nevet? Perak tenzor Kerne?

## 16

Kent dont aman da ziskuiz korf hon Madoberour  
A dle gouzanv c'hoaz eur wech taol-krog an enebour:  
Kana pouilh d'eun den maro, stlepel he golvaz krenn !!  
Araok ober kement-se eo ret beza Keben.

17

Pell zo oa kousket Ronan e leur e Benity;  
Kousk-dihun eo e ziskuiiz gant trouz an Droveni;  
Eur wech, tro-war-dro d'e vez, voe firbouch hag anken,  
Brezel, brezel kasaus. Rust vo an abadenn !

18

Alan, neuze kont Kerne, da zuk Breiz enebour,  
A bed Ronan kalonek da zont war e zikour,  
A guzas e Koad-Nevet, e dud du-man du-hont...  
Paotred an dug, dievez, voe trec'het gant an c'hont.

19

Gant o anoiou skrijus, ar Gêrgoad ha Kêrlaz  
Zo, war lavar hon tud koz, harzou an emgann-laz.  
Alan, diwar an taol-se, Gounidour lezanvet,  
A zavas eur manati: Lok-Ronan benniget.

20

Hirio, patron Breiz-Izel, da heul santez Anna,  
Sant Youenn a zo deuet aman da bardona;  
Gantan eur vandennad tud eus a vro Landreger,  
'N o zouez itron Koad-Tredrez gant mibien he maner.

21

Anna, hon dukez karet, tro daou c'hant vloaz goude,  
Diredet da gaout Ronan a baeas mad he dle,  
Pa lakeas adsevel e Benity ker koant  
Gant ar bez ken burzudus, gwir veulgan-mein he c'hoant.

22

Skeudenn ar zant gourvezet gant e dremm sioul ha dreo,  
E zaoulagad digor-bras, koulz ha pa vije beo,  
A zell ouz kened Doue bepred yaouank ha koz,  
Levenez gwalc'h e galon: dudi ar Baradoz.

23

Bep bloaz, 'n eur vont d'ar Palud, gwelit eskop Kemper  
En eil iliz-veur Kerne o tibun pedenn verr:  
Tal bez Ermit Koad-Nevet, kaer eo var e zaoulin  
Gant mintr skedus Kastell-Paol, baz aour sant Kaourintin.

24

Rak pa 'z oa savet dezan ken bras e gaer Iliz  
Ronan 'n em gavas nec'het ha mezus e peb giz;  
Kinnig 'ra da Gaourintin ar renk kenta enni,  
Sant Loiz, gwella roue Frans, e dalc'h er Penity.

25

Daoubleget, stard o pedi war barlenn e venez  
Gwelomp iliz sant Ronan, na koanta rouanez !  
Garidou dantelezet tro-distro d'he mantel,  
He bolziou kroazigellet a c'hoarz ouz an avel.

26

Rouanez diazezset, gant kaerder nerzuz tre,  
Ho kened zo peurbadus dreist holl re all Gerne,  
A zo, eur c'halz anezo, daoust d'o seiz ha d'o feill,  
Risklus da ziazeza e donder ar Ster-Deill...

27

Enni zo eun tamm labour e delc'h yañ an dero,  
Warnan sell ar pardoner, lagad ar reder-bro,  
A gav, brao bras displeget, buhez hor zant Patron,  
Frezoc'h eget prezegenn ear spered a galon.

28

Touriou bras sant Kaourintin n'o doa ket o c'horzenn,  
Tour Lokorn da Blogonneg a ziskoueze e benn;  
Ar gurun hen diskaras! Daoust hag eo evit mad?  
War ar re hen adzavo hon anaoudegez vad.

29

En amzer goz, hon tadou a redas pell amzer  
Beteg beziou hor Zeiz-Sant gant kals poan ha skuizder  
Da droveni sant Ronan hor zent, ho relegou,  
A zired, euz pemp parrez, war bevonn e roudou.

30

An nant-ze, merket gantan, kreuzet gant hon tud koz,  
Zo d'emp epad eiz devez, eun alc'houez-Baradoz :  
Holl zent Breiz hag hon ealez, war gleuziou aour an nenv,  
A zo grunchet, sebezet, a vouze'hoarz d'hon feiz krenv.

31

Luskellet gant an Hirglaz, banielou lugernus,  
'N o zouez kroaziou arc'hantet, holl o lintra skedus,  
A dreuzo, a hed teir leo, traonienn, menez ha kern,  
Warlerc'h relegou Ronan, kristenien a vil-vern!

32

Stouomp hor penn, Bretoned, gant karantez ha feiz,  
Dindan brec'h santez Anna, hirio dukez he Breiz;  
Saludomp holl o skeudenn, bouchomp da relegou,  
Da relegou sent hor gouenn a garas hon tadou.

33

Dirak menez sant Ronan pleg-vor Douarnenez  
'Zo eur gaer a berlezenn koantoc'h eget Ahez.  
O tilhajou, tud Kerne, zo perlez ho horn bro :  
An Droveni vo tenval mar na deuit ganto.

34

Sonit, kleier sant Ronan, dreist menez ha star'enn,  
Kasit, war brec'h an avel, ho mouez, nerzus, laouen !  
Sonit, kleier ar Palud, Plogonneg ha Kerlaz!  
Son Kergoat-Kemeneven ! Digor ho pardon bras !

(Pep gwir miret striz.)

J.-R. NIHOARN.

*Da veza gwerzet pevar real e profit iliz Lokorn ha chapel Sant-  
Thelo.*